

Սեդրակ Սիմոնի Շարիմանյանի հիշատակին (նվիրված ծննդյան 110-ամյակին)



Այս տարի լրացավ հայ վիրաբուժության պատրիարքի, Հայաստանում գիտական վիրաբուժության հիմնադիրներից մեկի, վիրաբուժության արժանավոր դպրոցի հիմնադիր, իմաստուն մանկավարժի և կլինիցիստի, ազնվագույն քաղաքացու, գիտության վաստակավոր գործչի՝ պրոֆեսոր Սեդրակ Շարիմանյանի 110-ամյակը:

Ս. Շարիմանյանը ծնվել է 1898թ. Թիֆլիսում: Ավարտելով տեղի գիմնազիան՝ նա ընդունվում է Խարկովի համալսարանի բժշկական ֆակուլտետը և ավարտում այն 1924թ.: Կարճ ժամանակ

անց պրոֆ. Հ.Ս.Քեչեկի կողմից հրավիրվում է Երևան և 1926թ. սկզբից աշխատանքի անցնում նրա կողմից ղեկավարած կլինիկայում, որտեղ որոշ ժամանակ աշխատելուց հետո գործուղվում է Ղափան և աշխատում այնտեղ որպես տեղի հիվանդանոցի վիրաբուժական բաժնի վարիչ: Այնտեղից կլինիկա վերադառնալուց հետո Ս. Շարիմանյանը գործնականի հետ մեկտեղ լայնորեն ծավալում է նաև գիտական աշխատանք, որի արդյունքը դառնում է 1936թ. թեկնածուական ատենախոսության պաշտպանությունը՝ առաջինը Երևանի բժշկական ինստիտուտում:

1936-1938թթ. Լենինգրադում, գիտական գործուղման ընթացքում, դոկտորական ատենախոսություն պատրաստելուց, հաջողությամբ պաշտպանելուց և Երևան վերադառնալուց հետո Ս. Շարիմանյանը 1940թ. ստանձնում է Երևանի բժշկական ինստիտուտի ընդհանուր վիրաբուժության ամբիոնի վարիչի պարտականությունները: Այդ պաշտոնում նա շարունակեց աշխատել շուրջ 33 տարի:

Լենինգրադյան գործուղման ընթացքում Ս. Շարիմանյանը նաև մասնագիտանում է որպես նյարդավիրաբույժ և 1938 թվականից սկսում է Երևանում ակտիվորեն ծավալել գործունեություն նյարդավիրաբուժության ասպարեզում, հաջողությամբ կատարելով ժամանակին համապատասխան այդ մասնագիտությանը պատկանող համարյա բոլոր վիրահատությունները, հիմք դնելով դրանով նյարդավիրաբուժությանը Հայաստանում:

Հայրենական պատերազմի ծանր տարիներին Ս. Շարիմանյանը չխնայելով իրեն, աշխատել է գիշեր ու գոր ուժերի գերագույն լարվածությամբ հոսպիտալներում, որպես առաջատար ընդհանուր վիրաբույժ և նյարդավիրաբույժ:

Ս. Շարիմանյանը շուրջ 30 տարի, լինելով Հայաստանի վիրաբույժների գիտական ընկերության նախագահ, ոչ միայն կարողանում էր փայլուն կերպով ու բազմակողմանիորեն կազմակերպել ընկերության աշխատանքը, այլև դարձնել այն երիտասարդ վիրաբույժների պատրաստման և կրթման դպրոց:

Ս. Շարիմանյանին իր ղեկավարած կլինիկայում հաջողվում է ստեղծել վիրաբույժական արժանավոր ու կոռ կոլեկտիվ, որում աճել ու ձևավորվել են այնպիսի անվանի վիրաբույժ-գիտնականներ, ինչպիսիք են պրոֆեսորներ Վ. Մալխասյանը, Վ. Սարուխանյանը, Ս. Մելիք-Խարայեյանը, Ս. Հովհաննիսյանը, Ի. Տոտկալուն:

Ս. Շարիմանյանը հանդիսանում է մայրենի լեզվով գրած (և չորս անգամ վերահրատարակված) ընդհանուր վիրաբույժության առաջին դասագրքի հեղինակ:

Մասնագիտական և հասարակական անձնվեր ու նվիրական գործունեության շնորհիվ Ս. Շարիմանյանը արժանացել է Միութենական և Հայաստանի Գերագույն Խորհրդների պատգամավորի պատվավոր կոչմանը: Ի տարբերություն սովետական ժամանակաշրջանի պատգամավորության ձևական գործելառճին, Ս. Շարիմանյանը ըմբռնում էր իր պատգամավորական պարտականությունները որպես ծառայություն ժողովրդին և կատարում էր այն ամենայն պատասխանատվությամբ և նվիրվածությամբ:

Հայրենիքը, բարձր գնահատելով Ս. Շարիմանյանի կատարած աշխատանքը բժշկական, գիտական և պետական-հասարակական գործունեության ասպարեզներում, պարգևատրել է նրան Լենինի երկու շքանշաններով և կառավարական այլ բարձր պարգևներով:

Մարդկային բարձր հատկանիշներով օժտված բժիշկ-հումանիստի, իր ժողովրդին ազնիվ ու անշահախնդիր մեծ ծառայություն մատուցած, բոլոր ուժերը մարդու առողջության գործին անմնացորդ նվիրած, տաղանդավոր կլինիցիստի, մանկավարժի և գիտնականի, ջերմ հայրենասերի, հայրենական բժշկության մեջ իր արժանավոր տեղը վաստակած մեծ անհատականության՝ Սեդրակ Շարիմանյանի պայծառ կերպարը կմնա հետմորդների հիշողության մեջ, որպես առաքինության, բարոյականության և մասնագիտական օրինավորության խորհրդանիշ:

Պրոֆ. Ռ. Ա. Գրիգորյան